

2010-mut Aningaasanut Inatsisissatut Siunnersuut

(Aningaasaqarnermut Naalakkersuisoq)

Akissuteqaat

(Aningaasaqarnermut Naalakkersuisoq)

Pingajussaaneerinninneq

Maanna 2010-mut aningaasanut inatsisissatut siunnersuut inaarutaasumik suliarisussanngorparput. Suliarinera tamaat ingerlatsineranut sanaartormullu tunngasortaata oqimaaqatigiinnissaa Naalakkersuisut erseqqissumik anguniagariuarpaat. Pingajussaaneerinninnermut matumunnga allannguutissatut siunnersuuteqarnikkut tamanna qularnaarneqarpoq.

Ingerlaqqinnginninni Aningaasaqarnermut Ataatsimiititaliamiittut sulinerannut isumaliutissiissuteqartarnerannullu, kiisalu Kultureqarnermut Ataatsimiititaliamiittut kultureqarnermut tunngasuni sipaarutissanut kinguneqartussamik tapersiinerannut qutsaviginiarpakka.

Pingajussaaneerinninnermut allannguutissatut siunnersuutit pingaarnerit

Naalakkersuisut aappassaaneerinninnermut allannguutissatut siunnersuutaat tamaasa Inatsisartut akueraat. Oqallinneq tunuliaqutaralugu pingajussaaneerinninnermut aalajangersimasunik allannguutissatut siunnersuuteqarnissamut pissutissaqarsimangilaq.

Taamaattumik Naalakkersuisut allannguutissatut siunnersuutiminni allannguutissatut siunnersuutissatut nalunaarutigineqartut teknikikkut allannguinerusut missingersuutinullu sunniuteqanngitsumik nuussinerusut tamaasa, kiisalu 2010-mi ingerlatsinerup sanaartormullu oqimaaqatigiisinniarneqarnissaat sammivaat.

AIS2010-p aappassaaneerneqarnissaanut allannguutissatut siunnersuutit IST-p inerneranut 2010-mi 28,9 mio. kr.-inik, ukiunilu missingersuusiorfiusuni 2011-2013-imi 35,2 mio. kr.-inik ajorseriaataapput.

IST-p inernerata ajorseriaateqarneranut pissutaanerpaavoq sammisaq 3-p – Isertitassatut ilimagisat nutaat inatsisitigullu pisussaaffigalugit aningaasartuutissatut ilimagisat nutaat, kingunerisaa, taanna IST-p inerneranut 2010-mi 25 mio. kr.-inik ukiunilu missingersuusiorfiusuni tamani 2011-2013-imi 31 mio. kr.-inik ajorseriaataalluni.

Aammattaaq aappassaaneerinninnermi Naalakkersuisut ilimasaarutigineqartut aningaasartuuteqarfiusariaqartunik allannguutissatut arlalinnik siunnersuuteqarput. Nutaanik aningaasartuuteqarnissamik siunnersuuteqartoqalersinnagu aningaasalersuinerup inissinneqaqqaartussaanaera taakku aatsaat saqqummiunneqarnerinut pissutaavoq.

Taamaattumik Naalakkersuisut aamma IST-mut pitsaasumik sunniutilinnik arlalinnik allannguutissatut siunnersuusiortut.

Siunnersuutit pingaarnersaat aappasaanerinninnermi ilimasaarutigineqartut tassaapput illoqarfinni minnerusuni nunaqarfinnilu immikkut suliniutinut 2010-mi 15 mio. kr.-inik aningaasaliissutitalimmik sillimmaeqarnerup nangeqqinneqarnissaa, ukiumut 30 mio. kr.-it sinnerlugit isumaginninnermut peqqinnissamullu tunngasuni aningaasartuuteqarnerunissat, kiisalu ingerlatseqatigiiffiup ukiup tulliani ingerlataminik nangitsisinnanissaanut Great Greenland A/S-imut 12 mio. kr.-inik akileeqaaruteqarnissaq.

Ajoraluartumik Great Greenland EU-mi puisit amiinik inerteqquteqarnermit nunarsuaq tamakkerlugu aningaasarliornermit sakkortusineqartumit eqqugaarujussuarpoq. Taamaammatt ingerlatseqatigiiffik tunineqarsinnaanngitsunik quersuarmiittuuteqarpoq. tamatumunnga peqatigitillugu puisit amiinut tapiissuteqartarnissaq qularnaarneqartariaaqarpoq. 12 mio. kr.-it taakku 2010-mi tunngaviumut ingerlatsinnermut qularnaarutaassapput.

Tamatuma saniatigut nuna tamakkerlugu aviisit ungasinnerusoq eqqarsaatigalugu ingerlatsinnerminnik naleqqussaasinnaanngorlutik tunisassioriaatsinut siammartereriaatsinullu nutaanut aningaasaliinissamut ukiuni ikaarsaariarfiusuni pingasuni ukiumut 1,5 mio. kr.-inik aningaasaliiffigineqartarnissaat Naalakkersuisut siunnersuutigaat.

Taamatutaaq Arctic Umiaq Linemut 2,5 mio. kr.-inik immikkoortitsisoqarpoq. Aningaasanik taakkuninnga immikkoortitsinikkut assartuussinnermut isumalioqatigiissitap kaammattuutai tunuliaqutaralugit Naalakkersuisut ungasinnerusoq eqqarsaatigalugu sinerissami angallassineq pillugu aalajangiisinaanissaat qularnaarneqarpoq. Taama pisoqanngippat Arctic Umiaq Linep aningaasaqarnini tunngavigalugu siunissami qaninnermi ingerlatseqatigiiffiup siunissaa pillugu aalajangiisariaqalertussaanaera pissutigalugu tamanna pisariaqarpoq.

Ingerlatsinnermut sillimmatit atorunnaarsinneqarnissaat Naalakkersuisut aningaasalersuutissatut siunnersuutigaat. Ingerlatsinnermulli sillimmatit ukiumut 10 mio. kr.-inik aningaasaliissutitalerlugit pigiinnarneqarnissaat Aningaasaqarnermut Ataatsimiititaliap inassutigaa. Naak Aningaasaqarnermut Ataatsimiititaliap siunnersuutaatigut IST-p inerna 10 mio. kr.-inik ajorseriartinneqartussaagaluortoq siunnersuutip akuerineqarnissaa Naalakkersuisut inassutiginiarpaat.

Sanaartornermut tunngasuni 2010-mi 35,3 mio. kr.-inik sipaaruteqarnissaq, kiisalu taamatutaaq 2010-mi 48,45 mio. kr.-inut nuussinissaq Naalakkersuisut siunnersuutigaat.

Aningaasalersuutissat sinneri Inuit Service Company A/S-imit ukiup tulliani 10 mio. kr.-inik iluanaaruteqarnerunissamik naatsorsuuteqarnermit pissarsiarineqassapput. Inuit Service Company A/S-ip aningaasaateqarnikkut ingerlatseqatigiiffiup ingerlanneqarneranut siunissami kinguneqartitsissutaanngitsumik akilerneqarsinnaasunik naapertuutinngitsumik upalungaarsimassuteqarpallaarsimaneramik naliliisoqarnera 2010-mi iluanaarutaanerusussanut pissutaavoq. Ingerlatseqatigiiffiup 2010-mut aktianit iluanaarutininik ataasiartumik qaffaanikkut aningaasaatini ikilisippai aningaasaateqarnikkullu upalungaarsimanini ingerlatseqatigiiffiup ingerlataanut pisussaaffigisaanullu naapertuutilersillugit.

Kiisalu isertitanut sillimmatini akitsuutininut nutaanut naatsorsuutigisatik 60 mio. kr.-init 2011-mit ukiumut katillugit 105 mio. kr.-inut qaffappaat. Sillimmatinik taakkuninnga atugassanngortitsineq Akileraarutininut Atugarissaarnermullu Ataatsimiititaliap kaammattuutai tunuliaqutaralugit isumaginninnikkut avatangiisitigullu oqimaaqatigiisitsilluni akitsuuteqartitsinikkut pissapput.

Aningaasaqarnermut Ataatsimiititaliap isumaliutissiissutaanut oqaaseqaatit

Ataaseq eqqaassanngikkaanni allannguutissatut siunnersuutit tamarmik akuerineqarpata Aningaasanut Inatsisip akuerineqarnissaa Aningaasaqarnermut Ataatsimiititaliap inassutigigaa Naalakkersuisut paasivaat. Ikinerussuteqartut allannguutissatut siunnersuutininut arlalippassuarnut inassuteqaataat paasivaat sammisallu taakku atuutilerpata sinissami oqallinnissamut peqataajumaarlutik.

Ataatsimiititaliap isumaliutissiissutimini arlalinnik piumasaqarpoq. Siullermik Assartuussinermut Isumalioqatigiissitap angallassinermi periuseq aallaavigalugu umiarsuarnik nunaqarfiliartaatinik nutaanik pisinermik naliliinissaa ataatsimiititaliap kissaatigaa. Inassuteqaat tamanna Naalakkersuisut akuerisinnaanngilaat, tassami suleqqinnissamut pilersaarusiortoqareermat. Siunissami ukiuni aamma nunaqarfinnut aalajaatsumik usinik angallassisoqarsinnaanissaa Naalakkersuisut kissaatigaat tamannalu umiarsuatoqqat amutsivimmiikulaartariaqarneri pissutigalugit taamaallaat nutaanik umiarsualiornikkut qularnaarneqarsinnaavoq. Taamaattumik RAL-ip aamma imarpikkoortaatini umiarsualiornissaq pillugu nunani allani amutsivinnik isumaqatiginninniarnissaanut peqatigitillugu maanna aningaasarliornerup akinik iluanaarfiunerani umiarsuarnik nutaanik pisinermik aallartitsinissaa Naalakkersuisut naapertuunnerusoraat. Piniarnissanik taakkuninnga kattussinikkut Naalakkersuisut sipaarnerusinnaassangapput. Taamaattumik piumasaqaat malinneqassanngilaq Naalakkersuisulli Aningaasaqarnermut Ataatsimiititaliamut ilisimatitsisartussaassapput taamatullu aamma Royal Arctic Bygdeservicemik kiffartuunneqarnissamik isumaqatigiissut nutaaq Aningaasaqarnermut Ataatsimiititaliamit akuerineqartussaassalluni.

Tulliullugu eqqagassalerinermut pilersaarutip AIS2011-mi piviusunnogrtinneqarnissaanik sulinerup killiffia pillugu juunimi ilisimatitsisoqarnissaa Aningaasaqarnermut Ataatsimiititaliap piumasaraa. Ilisimatitsissut nassiunneqarumaarpoq.

Illuut A/S AI10-mi saqqummiunneqartussa q pillugu inatsit Naalakkersuisunit maanna sulissutigineqarpoq. Tamatuma kingorna sanaartornermut tunngasuni immikkoortumut inatsimmik suliaqarneq Naalakkersuisut aallartinniarpaat. Tamatumunnga atatillugu taasinnaavara inissiani attartortittakkani qaammatinut arfinilinnut qularnaveeqqutinik akileeqqusinissamut, kiisalu ileqqorissaarnissamut malittarisassanik malinninnissamut tunngavik attartorneq pillugu inatsimmiimmat.

Kiisalu Naalakkersuisut sinnerlugit neriorsuutigissavara apeqqutinut allanut tunngatillugu paasissutisseeqqinnissamik ilisimatitsinissamillu ataatsimiititaliap piumasai nassiunneqarumaarmata, naak maani suli sammineqanngikkaluartut.

Allannguutissatut siunnersuutitut tunngatillugu allannguutissatut siunnersuut 259 ingerlatsinermit sillimmatit atorunnaarsinneqarnissaannut tunngasoq eqqaassanngikkaanni tamarmik akuerineqarnissaat Aningaasaqarnermut Ataatsimiititaliap inassutigaa. Tamatumunnga taarsiullugu Aningaasaqarnermut Ataatsimiititaliap sillimmatit 10 mio. kr.-inut ikilisinneqarnissaannik nammineq allannguutissatut siunnersuuteqarpoq. Taaneqareersutut Aningaasaqarnermut Ataatsimiititaliap siunnersuutaata akuerineqarnissaa Naalakkersuisut inassutigaa.

Taamatuttaaq Aningaasaqarnermut Ataatsimiititaliap siunnersuutaasa sinnerisa tamarmik akuerineqarnissaat Naalakkersuisut inassutigaa.

Aningaasaqarnermut Ataatsimiititaliap saniatigut aamma Kultureqarnermut Ataatsimiititaliap aningaasanut inatsisissatut siunnersuut oqaaseqarfigisimavaat. Kultureqarnermut Ataatsimiititaliap siunnersuutigisimavaa, Radioqarnermut TV-qarnermullu ataatsimiititaliap atorunnaarsinneqassasoq. Aningaasaqarnermut Ataatsimiititaliap tamanna tapersorsorpa allannguutissatullu siunnersuut nr. 286 tigusimallugu. Naalakkersuisut tamanna tusaatissatut tiguaat siunnersuullu akuersissutigineqassasoq inassutigalugu.

Aammattaq kontumut pingaarnermut qinnuteqaatit amerlassusaat tunuliaqutaralugit kontumi pingaarnermi 40.10.15-imi, Atuarfimmi nerisaqartitsineq, aningaasaliissutit 1 mio. kr.-inik ikilisinneqarnissaat Kultureqarnermut Ataatsimiititaliap siunnersuutigaa. Tamanna Naalakkersuisut tusaatissatut tiguaat allannguutissatullu siunnersuusiorlutik.

AIS 2010-mi IST-p inaarutaasumik inernera

Naalakkersuisut allannguutissatut siunnersuutaat tamarmik Inatsisartunit akuerineqassappata 2010-mut Aningaasanut Inatsisimmi IST 227,15 mio. kr.-inik inernejassaaq. Ingerlatsinertaa sanaartornertaalu qiviaraanni 2010-mi oqimaaqatigiittoqarpoq 2013-imilu 100 mio. kr.-it missaannik sinneqartooruteqartoqassalluni, taakkulu atugarissaarnerup sammineruneqarneranut ilanngullugit aningaasanut inatsisilerineq tamakkerlugu Naalakkersuisut anguniagaraat.

Naggasiutitut oqaaseqaatit

Taamatut oqaaseqarlunga 2010-mut aningaasanut inatsisissatut siunnersuut Inatsisartunut akuersaartumik suliassanngorlugu ingerlateqqippara.